

U skladu sa članom 12. i 14. Zakona o Udruženjima i fondacijama (Sl. Novine FBiH br. 45/02), Skupština Udruženja Omladinski košarkaški klub „SPARS '05“ na sjednici održanoj dana 26.08.2010. godine donosi:

## **STATUT UDRUŽENJA OMLADINSKI KOŠARKAŠKI KLUB „SPARS '05“**

### **I OPĆE ODREDBE**

#### **Član 1.**

Udruženje Omladinski košarkaški klub „SPARS '05“ / u daljem tekstu Klub/ je osnovna organizacija u sportu, nestranačka i nevladina organizacija, čija je osnovna djelatnost ostvarenje masovnosti u sportu i vrhunskih sportskih rezultata.

Klub čine članovi koji stiču taj status na način i po postupku utvrđenim Zakonom, drugim propisima i ovim Statutom.

#### **Član 2.**

Ovim Statutom uređuje se: naziv i sjedište Udruženja, ciljevi i djelatnost udruženja, zastupanje i predstavljanje, organi udruženja, njihove ovlasti, način imenovanja i opoziva, trajanje mandata, kvorum i pravila glasanja, oblik i sadržaj pečata i znaka, sticanje i raspolaganje imovinom, način donošenja finansijskog izvještaja i izvještaja o radu, postupak za donošenje Statuta i drugih opštih akata udruženja, uslove i način članjenja, uslove i postupak za pripajanje, razdvajanje, transformaciju ili prestanak rada, pravila za raspodjelu imovine u slučaju prestanka rada udruženja.

#### **Član 3.**

Udruženje ima svojstvo pravnog lica, a u pravnom prometu sa trećim licima posluje sa potpunom odgovornošću.

#### **Član 4.**

Udruženje može, u okviru svoje djelatnosti i programskih ciljeva, osnovati subjekte za privrednu i drugu djelatnost u skladu sa Zakonom.

#### **Član 5.**

Naziv Kluba je : Udruženje Omladinski košarkaški klub „ SPARS '05“  
Skraćeni naziv Kluba je : OKK „SPARS '05“  
Sjedište Kluba je u Sarajevu, adresa Provare broj 38.

#### **Član 6.**

Klub svoje zadatke i ciljeve ostvaruje na području Kantona Sarajevo.

#### **Član 7.**

Udruženje ima pečat i amblem.

Pečat Kluba je okruglog oblika, promjera 30mm, sa natpisom na rubu pečata: Udruženje Omladinski košarkaški klub „SPARS '05“ Sarajevo.

Znak kluba je latinično napisano Udruženje Omladinski košarkaški klub „SPARS '05“ Sarajevo.

#### **Član 8.**

Radi ostvarivanja ciljeva i programskih zadataka, Klub se može učlaniti u druge sportske asocijacije u skladu sa Zakonom i odlukom Skupštine, odnosno Upravnog odbora kluba.

#### **Član 9.**

U donošenju opštih i drugih akata, kao i u izgrađivanju prijedloga, stavova, mišljenja i inicijativa, Klub je nezavisan od drugih organa i institucija, političkih stranaka i drugih klubova i njihovih udruženja.

#### **Član 10.**

Klub raspolaže sa svojom pokretnom i nepokretnom imovinom.

#### **Član 11.**

Klub čine članovi (osnivači, sportisti, sportski radnici, stručni saradnici, zaposleni službenici i sponzori).

Svojstvo člana Kluba stiče se na način utvrđen ovim Statutom.

## **II PROGRAMSKI CILJEVI I DJELATNOST KLUBA**

### **Član 12.**

Ciljevi zbog kojih je Klub osnovan su :

- Ostvarivanje masovnosti i vrhunskih sportskih rezultata u košarci;
- Izgrađivanje sportiste kao vrhunskog takmičara i njegove ličnosti u duhu zahtjeva vremena u kojem živimo;
- Osposobljavanje stručnog kadra za rad sa sportistima;
- Rad sa juniorskim, kadetskim i dječijim selekcijama i na taj način okupljanje većeg broja zainteresovanih za bavljenje sportom;
- Predstavljanje i afirmacija Kantona Sarajevo i Bosne i Hercegovine na međunarodnim takmičenjima;
- Obezbeđuje materijalna sredstva radi finansiranja djelatnosti Kluba;
- Organizuje priredbe sportskog, vaspitnog, rekreativnog i zabavnog karaktera;
- Izgrađuje i održava sportske objekte, uređaje i nabavlja potrebnu opremu;
- Stara se o popularizaciji sporta i Kluba putem propagande djelatnosti, sredstava javnog informisanja, priredbi i povećanjem članstva;
- Stvara uslove za kontrolu zdravlja sportista kao i uslove za pružanje neophodne medicinske pomoći.

### **Član 13.**

Radi ostvarivanja utvrđenih ciljeva u članu 12. ovog Statuta, u Klubu se obezbeđuju sve neophodne materijalne, stručne i organizacione pretpostavke izvršenjem sljedećih zadataka i djelatnosti:

1. Utvrđuju planovi razvoja u skladu sa Statutom Kluba;
2. Uređuje organizacija Kluba;
3. Organizuje stručni rad sa odgovarajućim selekcijama;
4. Stvaraju uvjeti za osposobljavanje stručnog kadra;
5. Utvrđuju metodi i oblici prikupljanja materijalnih i u okviru toga, finansijskih sredstava, neophodnih za rad Kluba u skladu sa Zakonom, ovim Statutom i odlukama nadležnih organa Kluba;
6. Obezbeđuju savremeni sportski objekti sa odgovarajućim sportskim rekvizitima i sportskom opremom, primjerenom učesnicima sportskih takmičenja;
7. Organizovano obnavlja i poboljšava kvalitet takmičarskog i stručnog kadra u skladu sa mogućnostima i zahtjevima sistema takmičenja;
8. Uređuje ostvarivanje javnosti u radu organa Kluba, kao i odnos organa i članova tih organa, kao i stručnog kadra prema predstavnicima sredstava javnog informisanja;
9. Uređuje sistem informisanja članova Kluba i njegovih simpatizera o radu Kluba;

10. Utvrđuje pravila ponašanja takmičarskog i stručnog kadra kao i članova organa Kluba, te članova Kluba;
11. Uređuje način ostvarivanja saradnje Kluba sa drugim sportskim organizacijama i njihovim asocijacijama, te javnim i stručnim institucijama u oblasti fizičke kulture i sporta, kao i drugim pravnim i fizičkim licima;
12. Uređuje odnos Kluba prema njegovim zaslužnim sportistima, trenerima, sportskim radnicima i svima onima koji su dali doprinos razvoju i unapređenju Kluba;
13. Organizuje sportske manifestacije iz okvira svoje osnovne djelatnosti;
14. Uređuje sistem nagrađivanja i vrednovanja doprinosa ostvarenju sportskih rezultata, kao i rada organa Kluba;
15. Organizuje izvršavanje svih poslova i zadataka u skladu sa savremenim zahtjevima rada i privređivanja;
16. U Klubu se izvršavaju i drugi zadaci od značaja za ostvarivanje osnovnih ciljeva.

#### **Član 14.**

Planovima razvoja Kluba koji se odnose na godišnji ili četverogodišnji period, utvrđuje se nivo sportskih rezultata, kao i način obezbjeđivanja neophodnih materijalnih, kadrovskih i organizacionih pretpostavki za njihovo ostvarenje.

Klub može donositi i odgovarajuće operativne planove po različitim segmentima, radi ostvarivanja godišnjih, odnosno četverogodišnjih planova.

#### **Član 15.**

Radi ostvarivanja ciljeva, utvrđenih u članu 12. ovog Statuta i izvršavanju zadataka utvrđenih članom 13. ovog Statuta, Klub preko svojih organa donosi odgovarajuće opće i pojedinačne akte i propise, kojima uređuje i operacionalizira postupak njihovog ostvarivanja.

### **III PRAVA I DUŽNOSTI ČLANA KLUBA**

#### **Član 16.**

Članstvo u Klubu je dobrovoljno.

Članom Kluba može postati svako lice, bez obzira na državljanstvo, nacionalnu pripadnost, spol, uzrast, jezik, vjeroispovijest, stranačku pripadnost, političko i drugo uvjerenje, obrazovanje, socijalno porijeklo, imovno stanje ili koje drugo lično svojstvo.

Članom Kluba mogu postati i strani državljani, pod uslovom utvrđenim ovim Statutom i Zakonom.

Član Kluba, daje pismenu izjavu da prihvata Statut Kluba u potpunosti.

Po davanju pismene izjave, budući član Kluba dobiva člansku legitimaciju, čiji sadržaj i oblik utvrđuje nadležni organ Kluba.

O članstvu u Klubu vodi se posebna evidencija.

#### **Član 17.**

Član Kluba ima pravo na :

- Iznošenje vlastitih mišljenja, stavova, prijedloga i inicijativa od značaja za rad Kluba;
- Biranje članova u organe Kluba, kao i pravo da bude biran u ove organe, ako su navršili 18 godina života;
- Prijedlog za izbor nosilaca funkcija u organima Kluba, kao i pravo da bude biran za nosioca funkcija u tim organima;
- Objektivna, blagovremena i redovna obavještanja o radu Kluba i njegovih organa.

#### **Član 18.**

Član Kluba ima obavezu da se:

- Pridržava kodeksa ponašanja članova Kluba;
- Objektivno i nepristrasno u razgovorila ili na neki drugi način, izražava svoje mišljenje o radu Kluba i njegovih organa.

Član Kluba je obavezan da plaća članarinu u visini i na način utvrđen odlukom nadležnog organa Kluba.

- Da se u Klubu uzdržava svake političke aktivnosti.

#### **Član 19.**

Članovima Kluba smatraju se takmičari u svim sportskim selekcijama, stručni kadar koji radi za potrebe selekcija, kao i svi zaposleni u službi Kluba.

Licima iz prethodnog stava, izdaje se članska karta bez obaveze da ovaj član da pismenu izjavu i plaća članarinu.

Članarina za lica iz stava 1. ovog člana je dobrovoljna.

Članovi Kluba – takmičari mogu primiti stipendije, naknade i druge vrste novčanih primanja utvrđene opštim aktima Kluba.

#### **Član 20.**

Članstvo u Klubu, prestaje istupanjem člana Kluba, na osnovu njegove pismene izjave, brisanjem iz evidencije zbog neplaćanja članarine tri mjeseca uzastopno, isključenjem i smrću.

Prestanak članstva u Klubu – se takmičarima utvrđuje posebnim pravilnikom Kluba, te u skladu sa propisima sportskih asocijacija koje regulišu ovu oblast.

#### **Član 21.**

Prestankom članstva u Klubu, prestaju sva prava i obaveze člana u odnosu na Klub i njegovu imovinu.

Uplaćena članarina se ne vraća.

Članska knjižica se nakon prestanka članstva poništava.

#### **Član 22.**

Član Kluba može biti isključen, ako djeluje suprotno interesima Kluba, odnosno Statutu, programima rada Kluba, kao i kodeksu ponašanja člana Kluba.

Odluku o isključenju donosi posebna komisija, koju obrazuje Upravni odbor Kluba i čine je predsjednik i dva člana.

Žalba na odluku o isključenju, može se podnijeti Upravnom odboru Kluba, u roku od 15 dana od donošenja odluke o isključenju.

#### **Član 23.**

Inicijativu za donošenje odluke o isključenju, može podnijeti Upravni odbor i nadležni organi Kluba.

Inicijativa se pokreće u pismenoj formi i dostavlja nadležnoj komisiji Skupštine Kluba.

#### **Član 24.**

Član protiv kojeg je pokrenut postupak za isključenje, ne može do konačne odluke vršiti funkcije u organima Kluba, o čemu se donosi rješenje.

#### **Član 25.**

Član Kluba koji je brisan iz evidencije članstva ili je isključen iz članstva, može na vlastiti zahtjev ili na inicijativu nekog organa Kluba, ponovo postati članom Kluba, o čemu se odlučuje na način na koji je propisan za postupak isključenja člana iz Kluba.

## **IV ORGANIZACIJA KLUBA**

### **1. Skupština Kluba**

#### **Član 26.**

Skupština Kluba /u daljem tekstu Skupština/ je najviši organ Kluba u okviru prava i dužnosti Kluba.

#### **Član 27.**

Skupština u okviru prava i dužnosti Kluba:

1. donosi Statut Kluba, kao i dopune i izmjene Statuta, te druge akte određene Statutom,
2. daje saglasnost na pravne radnje poduzete u postupku osnivanja udruženja,
3. bira i opoziva članove Upravnog i Nadzornog odbora,
4. razmatra i usvaja izvještaje Upravnog i Nadzornog odbora,
5. odlučuje o udruživanju, pripajanju, razdvajanju, transformaciji, prestanku rada i drugim statusnim pitanjima,
6. utvrđuje i donosi planove razvoja Kluba,
7. razmatra pitanja, donosi odluke i druga akta koja se odnose na:
  - utvrđivanje metoda i oblika prikupljanja neophodnih materijalnih i u okviru toga finansijskih sredstava, neophodnih za rad Kluba
  - javnost rada organa Kluba kao i način informisanja članova i ukupne javnosti o radu Kluba,
  - saradnja Kluba sa sportskim organizacijama i njihovim asocijacijama, te javnim i stručnim institucijama u oblasti fizičke kulture i sporta,
  - nagrada i priznanja,
  - izbor i imenovanje nosilaca funkcija u organima Kluba, te o izboru poredstavnika Kluba u druge sportske asocijacije,
8. Donosi finansijski plan i usvaja Završni račun,
9. Vršiti druga prava i dužnosti u skladu sa ovim Statutom.

Skupština može, u skladu sa ovim Statutom i svojim odlukama, prenijeti u nadležnost Upravnog odbora određene poslove iz okvira svojih prava i dužnosti, osim onih koje se odnose na statusna pitanja i planove razvoja.

#### **Član 28.**

Skupštinu sačinjavaju svi punoljetni članovi Kluba.

### **Član 29.**

Mandat predstavnika u Skupštini traje 4 (četiri) godine, sa mogućnošću reizbora.  
Mandat predstavnika u Skupštini prestaje prije isteka vremena, kada ponese ostavku, bude opozvan ili u slučaju smrti.

### **Član 30.**

Skupština se može održati ako je prisutno 2/3 predstavnika.  
Skupština odlučuje većinom glasova od ukupnog broja prisutnih predstavnika.

### **Član 31.**

Skupština donosi Poslovnik o radu Skupštine.  
Poslovnikom se uređuju pitanja unutrašnje organizacije i rada Skupštine, uvjeti za rad predstavnika Skupštine, postupak donošenja odluka i drugih općih akata, način glasanja o pojedinim pitanjima od značaja za funkcionisanje Skupštine.

### **Član 32.**

Svaki predstavnik Skupštine ima pravo da učestvuje u radu Skupštine i u radu skupštinskih odbora i da odlučuje o pitanjima iz njihove nadležnosti, u skladu sa Statutom i Poslovnikom Skupštine.

### **Član 33.**

Predstavnik Skupštine ima pravo:

- podnijeti prijedloge i pokretati druga pitanja iz djelokruga Skupštine,
- postavljati pitanja koja se odnose na rad Upravnog odbora i skupštinskih odbora,
- tražiti obavještenja i podatke koja su mu potrebna za vršenje njegove dužnosti u Skupštini,
- da se obavještava o radu Skupštine, Upravnog odbora Udruženja, skupštinskih odbora i komisija.

### **Član 34.**

Predstavnik Skupštine je dužan da redovno dolazi na sjednice Skupštine i da se pridržava odluka Skupštine.



### **Član 35.**

Skupština ima predsjednika i jednog potpredsjednika, koje bira iz reda predstavnika Skupštine.

Mandat predsjednika i potpredsjednika je 4 (četiri) godine, sa mogućnošću reizbora.

### **Član 36.**

Predsjednik:

- predsjedava Skupštinom,
- saziva sjednice Skupštine,
- brine se o provođenju odredaba Poslovnika Skupštine,
- potpisuje akta koje donosi Skupština,
- vrši i druge poslove za koje ga ovlasti Skupština.

Skupština se može sazvati na prijedlog većine članova udruženja i na prijedlog Upravnog odbora Kluba.

Skupština se saziva najmanje jedanput godišnje.

### **Član 37.**

Potpredsjednik Skupštine pomaže predsjedniku Skupštine u vršenju njegovih poslova i zamjenjuje ga u odsutnosti ili druge spriječenosti.

### **Član 38.**

Radi razmatranja prijedloga, odluka i drugih akata kao i radi razmatranja drugih pitanja ili donošenje konkretnih zaključaka i rješenja o kojima je Skupština donijela opća akta i odluke, Skupština može obrazovati komisije kao svoja radna tijela.

Sastav, djelokrug i druga pitanja od značaja za funkcionisanje skupštinskih komisija, uređuju se Poslovníkom Skupštine ili posebnim odlukama.

### **Član 39.**

Skupština naročito, obrazuje radna tijela za izbor i imenovanje, kao i za nagade i priznanja.

## **2. Upravni odbor**

### **Član 40.**

Upravni odbor je izvršni organ Skupštine.

Upravni odbor ima predsjednika, potpredsjednika i tri člana.

Predsjednika i potpredsjednika Upravnog odbora, bira Upravni odbor iz reda svojih članova.

### **Član 41.**

Članove Upravnog odbora bira Skupština.

O predloženim kandidatima za članove Upravnog odbora u Skupštini se glasa tajno ili javno o čemu Skupština posebno odlučuje. Izabrani su oni članovi Upravnog odbora koji su dobili veći broj glasova od ukupnog broja prisutnih predstavnika Skupštine. Popunjavanje članova Upravnog odbora vrši se izborom na Skupštini, s tim da Upravni odbor ima pravo kooptirati lica u svoje članstvo čije angažiranje može značajno unaprijediti rad Kluba (sponzori, donatori, značajne osobe). Na prvoj narednoj sjednici Skupštine, mandat kooptiranih lica mora se verificirati.

### **Član 42.**

Mandat članova Upravnog odbora traje 4 godine.

Broj mandata članova Upravnog odbora nije ograničen.

Mandat člana Upravnog odbora može prestati razrješenjem, ostavkom ili opozivom.

Poslovníkom Skupštine potpunije se regulišu pitanja iz prethodnog stava.

### **Član 43.**

Upravni odbor vrši sljedeće poslove i zadatke:

1. Priprema sjednice Skupštine,
2. Priprema i predlaže nacrt izmjena Statuta i drugih akata iz nadležnosti Skupštine,
3. Provodi politiku, zaključke i izvršava druge odluke koje je donijela Skupština,
4. Upravlja imovinom Kluba i odgovoran je za funkcionisanje Kluba,
5. Donosi godišnje ili periodične izvještaje o svom radu i Finansijske izvještaje na kraju kalendarske godine i dostavlja ih Skupštini i Nadzornom odboru na usvajanje,
6. Utvrđuje prijedlog programa rada i finansijskog plana i odgovoran je za realizaciju istih,
7. Predlaže programe i planove razvoja Kluba,
8. Utvrđuje organizaciju i sistematizaciju Kluba,
9. Utvrđuje sistem stručnog rada sa odgovarajućim selekcijama u Klubu,
10. Utvrđuje ponašanje takmičara i stručnog kadra,
11. Daje uputstva i smjernice za rad funkcionerima Kluba,

12. Imenuje funkcionere Kluba i rukovodioce i članove odgovarajućih radnih tijela Upravnog odbora,

13. Imenuje šefa stručnog štaba, članove stručnog štaba ili trenere,

14. Razmatra pitanja, donosi akte, odluke, rješenja i zaključke koji se naročito odnose na:

- Utvrđivanje bitnih elemenata ugovora o sportskom sponzorstvu, sadržaju prava i obaveza, trajanje ugovora i cijena,
- Na disciplinske mjere i nagrađivanje,
- Za izvršenje finansijskog programa i plana,
- Organizaciju Kluba,
- Informisanje o javnosti o radu Kluba,
- Obezbeđivanje statusnih pitanja igrača, trenera, sportskog direktora Kluba /primanja, stanovanje, osiguranje, zdravstvena zaštita, nagrade i stimulacija/,
- Donosi potrebne akte i odluke u vezi izvršenja člana 4. ovog Statuta,
- Sportsku opremu i sportske rekvizite kao i korištenje sportskih objekata za takmičenja i treninge,
- Saradnja sa Sportskim savezima, udruženjima, javnim fondovima i stručnim institucijama i drugim organima i organizacijama,
- Vršiti i druge poslove od interesa za ostvarivanje ciljeva i zadataka Kluba u skladu sa svojim pravima i nadležnostima utvrđenim ovim Statutom i vlastitim odlukama 15. donosi Poslovnik o radu Upravnog odbora.

Upravni odbor se može održati ako je prisutna nadpolovična većina članova Upravnog odbora, a odluke donosi prostom većinom od ukupnog broja članova Upravnog odbora.

#### **Član 44.**

Predsjednik Upravnog odbora saziva i rukovodi radom Upravnog odbora, potpisuje akta Upravnog odbora i vrši druge poslove i zadatke koji se potpunije definišu Poslovnikom Upravnog odbora.

#### **Član 45.**

Upravni odbor može radi efikasnijeg i racionalnijeg izvršavanja svojih poslova i zadataka posebnom odlukom obrazovati radna tijela.

Odlukom iz prethodnog stava utvrđuje se sastav, djelokrug, broj članova i način ostvarivanja odgovornosti ovih radnih tijela prema Upravnom odboru.

#### **Član 46.**

Upravni odbor radi efikasnijeg i racionalnijeg obavljanja svojih poslova i zadataka obrazuje radna tijela iz oblasti stručnog rada sa svim selekcijama u Klubu, kao i iz oblasti zdravstvene zaštite.

Radi efikasnijeg i kvalitetnijeg rada u klubu, Upravni odbor može obrazovati Klub sportista i Klub sponzora, kao i druge klubove i selekcije unutar kluba.

#### **Član 47.**

Upravni odbor svojim Poslovníkom naročito utvrđuje vlastitu organizaciju rada kao i način ostvarivanja odgovornosti pojedinih članova Upravnog odbora prema Upravnom odboru kao i kolegijalnom upravnom tijelu.

### **3. Nadzorni odbor**

#### **Član 48.**

Kontrolu nad radom Kluba vrši Nadzorni odbor Kluba.

Nadzorni odbor čine 3 člana, koje bira Skupština Kluba, na period od 4 godine, sa mogućnošću reizbora.

Skupština radi praćenja ostvarivanja zakonitosti u radu i poslovanju Kluba, razmatra izvještaje Nadzornog odbora.

Nadzorni odbor Skupštini Kluba, podnosi izvještaj iz svog djelokruga najmanje jedanput godišnje.

Nadzorni odbor donosi poslovnik o svom radu.

Odredbe ovog Statuta, koje se odnose na Upravni odbor, shodno se primjenjuju i na Nadzorni odbor, ako iste nisu drugačije regulisane.

### **V JAVNOST RADA I INFORMISANJE**

#### **Član 49.**

Rad organa Kluba i drugih tijela je javan – u Klubu.

#### **Član 50.**

Javnost rada organa i tijela Kluba, obezbjeđuje se:

- javnim održavanjem sjednica;
- informisanjem članova Kluba kao i organa Kluba, saveza, javnih ustanova i stručnih institucija;
- redovnim održavanjem konferencija za štampu;

- objavljivanjem značajnih odluka iz osnovnedjelatnosti Kluba u štampi, na televiziji, radiju i dr.;
- javnim oglašavanjem donesenih osnovnih akata Kluba;
- javnim istupanjem članova u sredstvima javnog informisanja i dr.

#### **Član 51.**

Organi Kluba su dužni da na pogodan način obavještavaju javnost o zakazanim sjednicama i da omoguće njihovo prisustvo na sjednicama.

Organi Kluba mogu u posebnim slučajevima donijeti odluku o tome da rade na sjednicama bez prisustva javnosti.

U slučaju, utvrđenim prethodnim stavom, predsjednik organa Kluba dužan je javnost upoznati o razlozima takve odluke.

#### **Član 52.**

Organi Kluba mogu donijeti odluku da izdaju redovan ili povremen informativni bilten za javnost.

### **VI NAČIN OBEZBJEĐIVANJA FINANSIJSKIH I DRUGIH SREDSTAVA ZA RAD KLUBA**

#### **Član 53.**

Finansijska i druga sredstva za rad Kluba obezbjeđuju se od:

1. prihoda kao što su:

- Pokloni, donacije, dotacije,
- Sponzorski ugovori,
- Članarine,
- Drugih prihoda koji su regulisani u skladu sa Zakonom.

2. prihoda koji se ostvaruju putem donacija općina, Kantona Sarajevo , Federacije i Države Bosne i Hercegovine.

3. U slučaju zaključivanja značajnog sponzorskog ugovora, Klub ima pravo imenu dodati ime ili naziv sponzora.

#### **Član 54.**

Radi utvrđivanja namjene, obima i raspodjele finansijskih sredstava Klub utvrđuje finansijski plan za svaku godinu.

Prihodi i rashodi utvrđeni finansijskim planom moraju biti uravnoteženi.

## **VII ZASTUPANJE I PREDSTAVLJANJE**

### **Član 55.**

Lica ovlaštena za zastupanje i predstavljanje Kluba su predsjednik Upravnog odbora, jedan član Upravnog odbora i direktor kluba.

Naredbodavac za izvršenje finansijskog plana je predsjednik Upravnog odbora i lica koja posebnom odlukom ovlasti Upravni odbor.

Mandat lica ovlaštenih za zastupanje i predstavljanje Kluba je 4 godine, sa mogućnošću reizbora.

## **VIII UDRUŽIVANJE, TRANSFORMACIJA UDRUŽENJA ILI PRESTANAK RADA KLUBA**

### **Član 56.**

Klub se može udruživati u odgovarajuće strukovne saveze, te Sportski savez Kantona Sarajevo.

Udruživanje u saveze vrši se ugovorom, kojim se uređuju međusobna prava i obaveze.

Klub se može pripojiti drugom udruženju, razdvojiti na dva ili više novih udruženja.

Klub se može transformisati samo u drugo udruženje.

Odluku o udruživanju, pripajanju, razdvajanju ili transformaciji donosi Skupština Kluba, 2/3 većinom prisutnih članova.

### **Član 57.**

Klub prestaje sa radom u slučaju:

- Ako Skupština Kluba donese odluku o prestanku rada;
- Ako se utvrdi da je udruženje prestalo djelovati, donošenjem Rješenja na zakonom utvrđen način,

Odluku o prestanku rada kluba donosi Skupština dvotrećinskom većinom prisutnih članova.

## **IX PRAVILA ZA RASPODJELU IMOVINE U SLUČAJU PRESTANKA RADA KLUBA**

### **Član 58.**

Preostala imovina udruženja koje se briše iz Registra, rasporedit će se u skladu sa članom 46. Zakona o udruženjima i fondacijama (Sl. Novine FBiH br. 45/02).

## **X PRELAZNE I ZAVRŠNE ODREDBE**

### **Član 59.**

Statut Kluba usvaja se 2/3 većinom glasova ukupnog broja prisutnih članova Skupštine. Izmjene i dopune ovog Statuta, donose se po istom postupku po kojem se donosi i Statut. Inicijativu za izmjene i dopune Statuta, može podnijeti Upravni odbor ili 1/3 Skupštine Kluba. Inicijativa se dostavlja Skupštini i ukoliko je opravdana, dostavlja se Upravnom odboru radi utvrđenja prijedloga. Prijedlog Statuta se dostavlja na prvoj sjednici Skupštine na usvajanje. Tumačenje odredaba ovog Statuta, daje Skupština Kluba. Opšti akti udruženja se donose na isti način kao i Statut.

### **Član 60.**

Usklađivanje organizacije Kluba sa ovim Statutom, izvršiće se u roku od 30 dana od dana njegovog stupanja na snagu.

### **Član 61.**

Ovaj Statut stupa na snagu i primjenjuje se od dana donošenja, a primjenjivat će se danom upisa u Registar Udruženja.

Broj: 2/10  
Sarajevo, 26.08.2010.

PREDSJEDNIK SKUPŠTINE  
Maja Selimović